

# ARUBA A CELEBRA CARNAVAL MAHESTUOSO

## ORANJESTAD(AAN):

Aruba a celebra un carnaval mahestuoso, no solamente debi na e creatividad, inventividad, luho y beyeza yen di colorido, di locual e carnalistanan di e diferente grupo a presenta riba caya, pero tambe e ambiente festivo cu a reina durante e paradanan, e abundancia na musica cu e haci e carnaval aki monumental.

Tur indicacion tabata cu e carnaval di e aña aki lo kibra record di participacion y bira esun mas grandi di ultimo decada, mirando e duracion di 4 ora na Playa diadomingo, sinembargo, e no a logra kibra cifranan di e di 8 lustro di carnaval 1994.

E parada na San Nicolas si a logra e cifra di mas halto di ultimo decada kibrando e cifra di su record di 1999, cual cifranan colega **Juby Naar** lo bini cune mañan den stadisticanan di paradanan di carnaval di San Nicolas y Oranjestad.

Gruponan cu a destaca y cu tabata den contienda pa grupo di aña tabata **Coastal, Texaco, Brasilean Touch, y Olympus**, cu na San Nicolas tur indicacion tabata cu **Texaco** lo a bay cu e premio aki y cu a resulta diadomingo cu **Coastal** e bay cu premio di grupo di Aña.


Den musica e record di ultimo decada a wordo kibra cu e participacion di e 17 bandanan musical.

E competencia pa banda di aña tambe tabata fuerte e aña aki, den e diferente agrupacionnan musical grandi di nos isla, y cu finalmente diadomingo Oreó cu su cantantenan **Mighty Talent, Lady Ayes y Campo** a marca nan talento riba caya pa logra e titulo di Grupo musical di aña.

E cantidad di gruponan participante tampoco no a yega e total di 1994 na playa ni San Nicolas cu 14 grupo na Playa e aña aki y 15 grupo na San Nicolas.

**Johnnie Walker** cu a participa na San Nicolas no a participa na Playa diadomingo.

E caida remarcable tabata den total di brassbandnan den paradanan di carnaval cu tabata 4 ainda na 1995 y



cu a keda cay te na 2 di aña pasa y e aña aki, mientras cu **SoundSystem** den parada tambe a muestra un caida te 6 aña pasa y 3 e aña aki.

Remarcable den e carnaval aki, por menciona e crecimiento di bodypiecenan cu a cuminsa duna realce atrobe den nos carnaval. Varios aña no tabata tin mucho bodypiece mas compara cu antes, pero ultimo 3 añanan esaki a cuminsa aumenta un biaha mas.

Carosanan tambe a manera stanca desde 1996 cu tabata tin 16 y cu el a keda baha y pa e aña aki tabata tin 12.

E aña aki e gruponan a resalta pa e beyeza di e trahenan di cada seccion di e grupo, of seccion segun bodypiece cu nan ta acompaña. **Coastal, Brasilean Touch, Olympus y Texaco** a briya cu nan trahenan di seccionnan.

Luhoso tambe tabata e fantasia di oro y plata di **Gold and Silver Fantasy** cu nan trahenan y nan piezanan cu a lombra riba caya diadomingo. **Champagne Group** cu su cazadoman africano a duna un dimension semi luhoso na e grupo y e parada y cu un creatividad admirable.

Mester menciona cu den animacion e aña aki, **Brasilean Touch** a laga e otro gruponan atras ya cu e grupo aki for di principio te final tabata un placer pa mira con nan tabata goza di

nan carnaval y nan musical.

**Los Laga Bay** no tabata e **Los Laga Bay** den animacion cu Aruba a conoce den carnaval, y por a nota cerca algun di e miembronan mes cu a expresa cu e animacion ta "low".

Otro grupo cu sa anima bastante pero cu tambe tabata riba "slow speed" den crea nan ambiente camavalesco tabata **Hospijollies**.

**Champagne Group** tabata bon anima tambe pero no manera a goza di nan den parada di reinanan y **parada di luz di Aruba Tivoli Club**.

Gruponan comico tampoco tabata locual por a spera den humor pa pone publico hari. **Tiki Loco** a haci loke nan tabata por cu nan carosa di "mamasitanan" y **Cheppy Posterij** cu su "auto di polis", pero a keda leeuw di loke den pasado "Aiky y su grupo" tabata pone riba caya.

Tanto na San Nicolas como na Playa, e publico a expresa masha elogio pa e parada y locual nan a mira ta desfilando nan dilanti, principalmente e ambiente cu a ser crea, tanto na Playa como San Nicolas.

Di San Nicolas atrobe tabata tin e "grito" di cu e ambiente real festivo ta haye den San Nicolas, y aki "**Brasilean Touch**" a pone nan marca e aña aki, prome cu a sigui e dia siguiente na Playa.

Un admiracion inmenso tabata tin tanto na San Nicolas como na Playa, pa e actitud di polis e aña aki. Algo cu no sa pasa normalmente a pasa e aña aki cu e trabao di polis a wordo elogia den tur su aspecto, tanto di direccion di parada, actitud di polis pa esnan cu tabata bula baricada of cu a wordo ordena pa bay tras di baricada, y den manera tactico cu polis a eherce su trabao cu personanan cu por a bira fastioso durante e parada.

Tur caminda por a tende hende papia di polis esaki y polis esaya, y nada den forma negativo.

Cu polisnan a disfruta tambe, por a nota na cierto

lugarnan unda hasta nan tabata move curpa cu publico of cu carnalistanan cu tabata envolvi nan den nan bailenan, y publico a goza di esaki masha hopi, ya cu e agentenan a demostra cu nan tambe por disfruta eherciendo nan trabao.

Carnaval 2001, e prome carnaval di e milenio aki tabata un cu pa hopi aña lo sigui papia di dje, pasobra tabata trata di un carnaval den cual tanto polis, publico, carnalistanan di gruponan, musiconan y asistentenan a goza di dje y a expresa nan satisfaccion cu e manera disciplina cu el a tuma lugar e dos dianan di parada.